

**COFNODION CYFARFOD BLYNYDDOL A CHYFFREDINOL  
CYNGOR CYMUNED LLANENGAN a gynhaliwyd nos Fercher, Mai  
13eg, 2015 am saith o'r gloch**

**PRESENNOL**

Catherine Ll. Morris (Cadeirydd), Robert M. Jones (Is-gadeirydd), Wyn Griffiths, John E. Griffiths, Alun Jones, John Gwilym Jones, Erfyl W. Roberts, O. Hefin Roberts, R. Phillip Roberts, William B. Williams, Cyng. R.H. Wyn Williams (Cyngor Gwynedd)

**YMDDIHEURIADAU**

Thelma Cordingley, June Jones, Cyng. John B. Hughes (Cyngor Gwynedd)

**ABSENNOL**

Gwilym Hughes

Croesawodd y Cadeirydd bawb i'r cyfarfod, yn arbennig Mr. Colin Jones, Rheolwr Parcio a Diogelwch Ffyrdd. Fe'i gwahoddodd i siarad cyn i'r Cyngor gynnal ei Gyfarfod Blynyddol a Chyfarfod Misol arferol.

**SGWRS GAN COLIN JONES, RHEOLWR PARCIO A DIOGELWCH FFYRDD**

Rhoddodd gefndir yr adolygiad parcio i ailstrwythuro asedau parcio, ffioedd ac ati. Derbyniwyd nifer o argymhellion i drafod yr adolygiad megis codi tâl yn meysydd parcio'r Sir – Porth Neigwl yn y gymuned hon – yn unol â phenderfyniad Cabinet y Cyngor ac na ddigwydd unrhyw beth am gryn amser eto – efallai blwyddyn neu ddwy hyd yn oed.

Derbyniwyd sylwadau'r Cyngor hwn i'r ymgynghoriad cychwynnol, sef nad yw'n gwneud synnwyr codi am barcio ym Mhorth Neigwl a fyddai'n dwysáu'r broblem honno, gan mai ond lle i ddeuddeg car sydd yno a phe gwneid hynny, parcio ar y ffordd ddigwyddai wedyn; ategwyd hynny'n bendant iawn. Erbyn hyn, sylweddolwyd nad Cyngor Gwynedd yw perchennog y tir – nodwyd hynny yn yr ymateb gwreiddiol hefyd – felly, bydd rhaid i'r Adran gael trafodaeth â'r perchennog.

Diweddodd drwy ddweud, er gwybodaeth, yr argymhellir codi ffi am barcio ar strydoedd megis Y Cob ym Mhwillheli yn yr adroddiad adolygiad parcio. Ystyrir ger Y Fach hefyd.

Cafwyd cyfle i ofyn cwestiynau iddo cyn i'r Cadeirydd ddiolch iddo am ddod.

**COFNODION Y CYFARFOD BLYNYDDOL**

**1. ETHOL CADEIRYDD**

Etholwyd Cyng. Robert Morris Jones (Ward Llanengan) yn Gadeirydd am y flwyddyn 2015 – 2016.

## 2. ETHOL IS-GADEIRYDD

Etholwyd Cyng. John Gwilym Jones (Ward Aber-soch) yn Gadeirydd am y flwyddyn 2015 – 2016.

## 3. TROSGLWYDDO'R GADAIR

Wrth drosglwyddo'r gadair, dywedodd y Cadeirydd na lwyddodd roi clo ar y tair nod a oedd ganddi, sef:

- i) cwblhau toiledau Lôn Traeth, Aber-soch
- ii) cael trefn ar Gronfa'r Cadeirydd (o ran arwyddo'r sieciau)
- iii) cytundeb gwaith y Clerc – gobeithiodd gau pen y mwdwl ond, ni all Paul Egan, Un Llais Cymru, gysylltu â hi tan ddydd Gwener.

Dymunodd yn dda i'r Cyng. Robert Morris Jones yn ystod ei dymor fel Cadeirydd. Diolchodd yntau i'r Cyn-gadeirydd am ei gwaith. Mynegodd yr Is-gadeirydd ei ddiolch yntau am waith cydwybodol y Cyn-gadeirydd yn ystod ei blwyddyn – ategwyd hynny gan bawb.

## 4. DYDDIADAU CYFARFODYDD 2015 – 2016

Dosbarthwyd copi i bawb, ynghyd â rhoi un ar hysbysfwrdd y Ganolfan.

## COFNODION Y CYFARFOD MISOL

### 1. DATGAN BUDDIANT PERSONOL

Nid oedd gan neb fuddiant i'w ddatgan.

### 2. CADARNHAU COFNODION

Cynigiwyd ac eiliwyd bod cofnodion y cyfarfod a gynhaliwyd ar Ebrill 8fed, 2015 yn gywir.

### 3. CEISIADAU CYNLLUNIO

Trafodwyd y ceisiadau a ganlyn:

- |                |  |
|----------------|--|
| C15/0246/39/LL | Adeiladu pedwar tŷ preswyl â gwaith atodol yn cynnwys dull mynediad a thirlunio manwl (ail-leolir Uned 13 o Ganiatâd C13/0736/39/LL â'r cais yma, felly y bwriad yn cynnwys tri tŷ ychwanegol) – Harbour Hotel, Aber-soch – <b>Cefnogi</b> |
| C15/0290/39/LL | Estyniad deulawr ochr i'r tŷ ac estyniad porth car i'r modurdy – Hafod, 127 Cae Du, Aber-soch – <b>Cefnogi</b>   |
| C15/0341/39/LL | Gwaith peirianyddol i greu llithfaen – Ynys Sant Tudwal (Gorllewin), Aber-soch – <b>Cefnogi</b>  |
| C15/0354/39/LL | Cais i godi modurdy yn cynnwys lifft integrol – The Anchorage, Pen Bennar, Aber-soch – <b>Cefnogi</b>  |

C15/0373/39/LL	Estyniadau deulawr cefn ac ochr yn cynnwys balconi ac ymestyn adeilad allanol – Cartref, Bwlchtocyn – <b>Cefnogir ond, mynegwyd pryder am ei faint er credid mai ofer yw hynny o gofio beth ddigwyddodd ym Mhlas Gwyn drws nesaf</b>
C15/0382/39/LL	Adeiladu talcen at edrychiad blaen i greu ystafell ymolchi <i>en-suite</i> llawr cyntaf – 9 Sant Tudwal, Mynytho – <b>Cefnogi</b>
C15/0398/39/LL	Adnewyddu caniatâd cynllunio C10D/0063/39/LL ar gyfer estyniadau llawr cyntaf ac unllawr cefn – Crow’s Nest, 156 Cae Du, Aber-soch – <b>Cefnogi</b>

#### 4. MATERION YN CODI

##### a) **Toiledau Cyhoeddus – Tyddyn Callod, Aber-soch**

- Ni fu raid drilio clo allanol i’r drysau – eglurodd cynrychiolydd y cwmni wrth yr adeiladwr sut mae eu hagor pe cyfyd argyfwng. Ond, o ganlyniad, rhaid i’r glanhawr dalu am wneud...! Awgrymwyd holi beth yw’r drefn o ran ad-dalu.
- Ni osodwyd y gysyr dŵr poeth – tua £300.00 + TAW yw ei bris.
- Banciwyd £226.80 o arian mynediad hyd yn hyn – ceisir gwneud bob pythefnos.
- Addaswyd ychydig ar eiriad yr arwydd i’w roi ar y toiledau. Derbyniwyd amcanbris o £288.20 + TAW am y plac a £87.50 am ei osod gan Cerrig – penderfynwyd gofyn am amcanbrisiau eraill gan fod hwn yn ddrud.
- Costia enwebiad Gwobr Toiled y Flwyddyn 2015 £125.00 ac mae’r dyddiad cau ar Fehefin 30ain; penderfynwyd ymgeisio, gan obeithio y cwblheir y manion bethau sydd angen eu gwneud mewn pryd.

##### b) **Biniau Baw Cŵn**

- Cysylltodd Kevin o’r Ymddiriedolaeth Genedlaethol i ddweud fod popeth yn iawn gosod y bin yn y maes parcio ac na ragwelai y gallai’r anifeiliaid ei ddisodli. Ni lwyddwyd trefnu cyfarfod i’w osod eto; penderfynwyd gofyn i’r contractwr brynu postyn.
- Gosodwyd y biniau stryd i gyd erbyn hyn ond, ni dderbyniwyd ateb i’r ymholiad a osodir un ychwanegol ger offer sglefrfyrdio Cae Chwarae Aber-soch – cais a gyflwynwyd dros flwyddyn yn ôl.

##### c) **Swydd a Chytundeb Gwaith y Clerc**

Eglurodd y Cadeirydd y disgwylia ymateb Paul Egan, Un Llais Cymru, i gau pen y mwdwl ar Gytundeb y Clerc. Hysbysodd Griffith, Williams & Co. i ddweud fod ad-daliad a chodiad cyflog yn yr arfaeth.

##### ch) **Foel Gron a Thir Comin Mynytho**

###### i) ***Cynllun Glastir***

Cyfarfu perchennog Tŷ Uchaf, Charlotte Williams, Cyfoeth Naturiol Cymru, WG a’r Clerc i drafod yr uchod – mae’n hapus cydweithio a chynorthwyo pe bai angen.

###### ii) ***Tir Pen y Mynydd***

Ymatebodd Cyfreithiwr y Cyngor i’r ymholiad faint fyddai cost llunio cytundeb cyfreithiol (£250.00 + TAW) ar gyfer y tenant newydd;

penderfynwyd gofyn i Merfyn Pugh baratoi un fel yr awgrymodd y Cyfreithiwr.

iii) ***Ty'n Ronnen, Mynytho***

Cwblhawyd y gwaith – gweler Cadarnhau Taliadau a Derbyniadau isod – £704.75.

d) **Un Llais Cymru (ULIC) – Rhaglen Grant Gwefannau Llywodraeth Cymru**

- Crëwyd y wefan erbyn hyn ac anfonwyd ychydig luniau.
- Derbyniwyd y nawdd a chadarnhawyd talu gweddill anfoneb (£1298.00) Delwedd heno – gweler Cadarnhau Taliadau a Derbyniadau isod.

dd) **Cae Chwarae Aber-soch**

- Cwblhawyd torri'r drain a'r eithin yn y fynedfa – cadarnhawyd talu'r anfoneb (£704.00 – gweler Cadarnhau Taliadau a Derbyniadau isod) heno.
- Bwriada'r contractwr osod y ffens a'r giât newydd cyn y Sulgwyn.
- Derbyniwyd cais oddi wrth Bwyllgor Regata Aber-soch yn gofyn caniatâd defnyddio'r Cae Chwarae i gynnal chwaraeon yn ystod yr wythnos – cydsyniwyd.

e) **Glanhau Afon Soch**

Ni dderbyniwyd gohebiaeth bellach.

f) **Cronfa Florence Guest Morgan**

Noda gohebiaeth a dderbyniwyd oddi wrth yr Adran Addysg y pasiodd y Gwasanaethau Cymdeithasol nifer o geisiadau am gyfraniad o'r Gronfa Ddifrifol Wael ond, ni dderbyniwyd yr un ar gyfer Cronfa Merched Beichiog a Lles Plant; £2300.00 yr un sydd yn y ddwy gronfa, sef eu llogau.

ff) **Meddygfa Aber-soch**

Ni dderbyniwyd gohebiaeth bellach. Awgrymwyd a ddylai'r gymuned geisio brynu'r safle...

g) **Cheshire Lamont – Gwesty'r Harbwr/'Harbour Mews Development'**

Ni dderbyniwyd ymateb i ohebiaeth parthed yr uchod na chais am sylwadau ar y bwriad o greu'r llwybr ar lan Afon Soch.

ng) **Gohebiaeth aii) Un Llais Cymru (ULIC)**

Ni wnaed dim ag ymatebion y cynghorau eraill ond, yn sicr, ar ôl i'r Clerc fynychu'r cyfarfod a drefnwyd ym Metws y Coed i drafod yr Ymgynghoriad ar Bapur Gwyn Llywodraeth Cymru, cysylltir i gwyno. Fe'i cynhaliwyd yn uniaith Saesneg, ar wahân i gyflwyniad y siaradwr, a oedd yn Gymro Cymraeg, er bod cyfieithydd yn bresennol.

h) **Cyfreithwyr Gamlins – Cae Chwarae Aber-soch**

Ni dderbyniwyd ateb oddi wrth berchnogion 20 Maes Awel parthed arwyddo Trosglwyddiad newydd. Atebodd Cyfreithiwr y Cyngor y dylid aros tan ddychwela perchnogion 23 Maes Awel o Ffrainc ym mis Gorffennaf i gwblhau'r ddau'r un pryd.

- i) **Canllawiau ar Reoliadau Cyfrifon ac Archwilio (Cymru) 2014 – Cyfieithu**  
Anfonwyd llythyr i Uned Gwynion Ganolog, Llywodraeth Cymru, i gwyno am ddiffyg cyfieithu'r uchod, ar gyngor Swyddog Ymchwilio a Gorfodi, Comisiynydd yr Iaith.
- l) **Gohebiaeth a) Un Llais Cymru (ULIC) – i) Ymgynghoriadau ar Eithriadau i Breimiwm Treth y Cyngor ar gyfer Cartrefi Gwag Hirdymor ac Ailgartrefi yng Nghymru**  
Dyddiad cau'r ddau yw Mehefin 13eg. Ni chyfarfu'r gweithgor y soniodd y Cyng. Wyn Williams amdano eto.
- ll) **Gohebiaeth a) Un Llais Cymru (ULIC) – iii) Ymgynghori ar Bapur Gwyn y Llywodraeth “Diwygio Llywodraeth Leol – Grym i Bobl Leol”**  
Cyflwynwyd sylwadau ar yr ymgynghoriad erbyn Ebrill 28ain. Treuliodd wyth awr yn paratoi'r ymateb – mae newidiadau mawr yn yr arfaeth.
- m) **Gohebiaeth d) John D. Roberts – Archwilio Cyfrifon 2014 – 2015/Hacker Young**  
Derbyniwyd y ffurflenni pwrpasol oddi wrth Hacker Young, ond ni lwyddwyd trefnu mynd â'r dogfennau i Mr. Roberts fel bwriadwyd – eir â hwy i Swyddfeydd y Cyngor cyn Mai 26ain.
- m) **Cais Cynllunio – C15/0246/39/LL Adeiladu pedwar tŷ preswyl â gwaith atodol yn cynnwys dull mynediad a thirlunio manwl (ail-leolir Uned 13 o Ganiatâd C13/0736/39/LL â'r cais yma ac felly y bwriad yn cynnwys tri tŷ ychwanegol) – Harbour Hotel, Aber-soch**  
Derbyniwyd e-bost oddi wrth Gwennan Jones, Uwch Swyddog Rheolaeth Datblygu, yn gofyn am sylwadau ar ddewis o bedwar tŷ fforddiadwy neu chwe fflat/apartment ar y safle – cynnig newydd gan y datblygwr – ond, penderfynwyd y dylid cadw at y pedwar tŷ oherwydd bod mwy o angen lleol amdanynt.

## 5. MATERION PRIFFYRDD

- a) **Parcio ym Mhorth Neigwl**
  - i) **Llinellau Gwyn Igam Ogam**  
Ni dderbyniwyd ateb oddi wrth Iwan ap Trefor, Peiriannydd Traffig, i'r ymholiad a ellid ychwanegu mwy o linellau gwyn igam ogam.
  - ii) **Cyfngiad Parcio**  
Gweler cofnod sgwrs gan Colin Jones, Rheolwr Parcio a Diogelwch Ffyrdd, uchod.
- b) **Rhaglen Waith mis Mai**  
B4415 Rhydgaled – Pont Inkerman – gwaith clytio.
- c) **Ffens ger Isfryn, Mynytho**  
Derbyniwyd ymateb oddi wrth Gyfreithiwr y Cyngor. Awgryma cynllun Y Gofrestrfa Tir bod y llwybr yn rhan o erddi'r tai a byddai rhaid cael copïau o'u cynlluniau i weld os ydynt yn dangos y llwybr (£6.00 am bob eiddo – derbyniodd y Clerc ganiatâd y Cadeirydd i'w harchebu). Ychwanegodd efallai

nad yw'r perchnogion yn ymwybodol bod y llwybr yn perthyn iddynt ac y byddant yn fodlon cydweithredu â'r Cyngor i drosglwyddo'r llwybr iddo yn ffurfiol yn hytrach na derbyn unrhyw gyfrifoldeb amdano. Noda, hefyd, gan fod y llwybr wrth ochr y ffordd fawr, y byddai'n fwy priodol i Gyngor Gwynedd gymryd cyfrifoldeb am y cyfryw yn hytrach na'r Cyngor Cymuned.

ch) **Parcio ar Lôn Pen Cei, Aber-soch**

Yn dilyn cwyno am yr uchod, derbyniwyd ymateb oddi wrth Iwan ap Trefor, Uwch Beiriannydd Traffig, a noda nad oes digon o amser (dwy flynedd) wedi mynd heibio i ailystyried y cais o newid y gwaharddiadau tymhorol ond, cedwir golwg ar y sefyllfa eto yn yr Hydref...!

6. **MATERION HAWLIAU TRAMWY – LLWYBRAU CYHOEDDUS**

a) ***Arwydd Mynyddoedd Eryri ar y Llwybr Arfordir ger Cim***

Gan na dderbyniwyd gohebiaeth bellach oddi wrth Stuart Lawrence, Rheolwr Grŵp Ystadau, ceisiwyd cysylltu'n uniongyrchol â'r swyddog yng Nghyngor Shropshire parthed yr arwydd; ni dderbyniwyd ateb cyn heno.

b) ***Llwybrau'r Gymuned – Llwybr 69 Bryn Ffynnon, Stad Sant Tudwal, Mynytho***

- Ni dderbyniwyd gohebiaeth bellach oddi wrth Huw Tudor.
- Derbyniwyd copi o ohebiaeth rhwng Dewi Wyn Owen, Uwch Swyddog Hawliau Tramwy, a pherchennog yr eiddo uchod – newidiwyd y llawr caled i fod yn un addas fel llwybr cyhoeddus, tynnwyd y pyst ffens, ynghyd â dymchwel y wal a adeiladodd ar draws y llwybr. O ganlyniad, tynna DWO ei wrthwynebiad i gais cynllunio'r perchennog ac, yn yr un modd, gofynna i'r Cyngor hwn wneud yr un peth fel y gall symud ymlaen i ailagor y llwybr a newid ei gategori; penderfynwyd cytuno â'i gais.

c) ***Taith Gerdded Ddigidol***

Gan na dderbyniwyd ymateb oddi wrth ddylunydd taith Nefyn, cysylltwyd â Bleddyn Prys Jones, Rheolwr Gwasanaeth AHNE, i ofyn am ei gymorth, ond ofer fu'r cais hyd yma.

ch) ***Llwybr 57 Mynytho a'r Shanty, Penbennar***

Yn dilyn derbyn ymholiadau am yr uchod, cysylltwyd â Dewi Wyn Owen ac atebodd:

- i) ***Llwybr 57*** – symudodd y cerrig a ddisgynnodd am y tro a noda mai cyfrifoldeb y perchennog tir yw cloddiau fel waliau a ffensys
- ii) ***Shanty, Penbennar*** – mae dwy ffordd o gofrestru llwybr ac awgryma'r ail, sef gwneud cais dan Ddeddf Bywyd Gwyllt a Chefn Gwlad o ganlyniad i dros ugain mlynedd neu fwy o ddefnydd heb wrthwynebiad neu gytundeb y perchennog. Adroddodd WBW mai ef yw'r perchennog.

d) **Fforwm Mynediad Dwyfor**

Deallwyd fod Dewi Roberts yn fodlon dod i siarad â'r Cyngor pe bai angen trafod unrhyw fater mynediad.

7. **ADOLYGU A MABWYSIADU RHEOLAU SEFYDLOG/ARIANNOL A PHOLISIÄU**

Gohiriwyd trafod y rhain oherwydd diffyg amser.

8. **GOHEBIAETH**

a) **Un Llais Cymru (ULIC)**

- i) ***Côd Ymarfer ar Faterion y Gweithlu a Ffurflen Fonitro Flynyddol***  
Copïau, er gwybodaeth, o'r uchod; mae angen dychwelyd y ffurflen erbyn Ebrill 30ain yn flynyddol.
- ii) ***Llythyr Edwina Hart, Gweinidog yr Economi, Gwyddoniaeth a Thrafnidiaeth***  
Ateb yr uchod i lythyr ar ran Pwyllgor Arfon Dwyfor parthed newidiadau i amserlen trenau ar hyd Llinell Cambria.
- iii) ***Gorchymyn Deddf Llywodraeth Leol (Democratiaeth) (Cymru) 2013 (Cychwyn Rhif 2) 2015 yn Dod i Rym***  
Daeth yr uchod i rym ar Fai 1af. Golyga bod rhaid i gynghorau cymuned a thref gyhoeddi gwybodaeth benodol yn electronig, yn cynnwys Clerc ac Aelodau, cofnodion cyfarfodydd ac unrhyw ddatganiad archwiliedig o'u cyfrifon, cofrestr buddiannau aelodau. Diwygir Pwyllgorau Safonau ar y Cyd a chyfeirio Achosion o Gamymddwyn/Ceisiadau Goddefeb. Penderfynwyd ychwanegu'r rhain at y Rheolau Sefydlog/Ariannol.
- iv) ***Cynllunio Cadarnhaol: Bil Cynllunio (Cymru)***  
Gwybodaeth am ddau gam cyntaf proses ddeddfwriaethol yr uchod. Cynigiwyd gwelliant iddo a olyga bydd rhaid i awdurdodau cynllunio dalu sylw i ystyriaethau yn ymwneud â'r Gymraeg wrth benderfynu ar geisiadau cynllunio, ble bo hynny'n berthnasol i'r cais.
- v) ***Trosglwyddo Asedau Cymunedol***  
Cyswllt ar wefan Llywodraeth Cymru i gyfarwyddwyd am yr uchod.
- vi) ***Y Llais***  
Copi, er gwybodaeth.

b) **Cyfoeth Naturiol Cymru – Cyfarfodydd Trafod Ardaloedd Cadwraeth Arbennig ac Ardaloedd Gwarchodaeth Arbennig**

Gwahoddiad i fynychu'r uchod yng Ngholeg Meirion Dwyfor, Pwllheli, rhwng dau a saith o'r gloch fory (Mai 14eg).

c) **Swyddog Morwrol a Pharciau Gwledig**

Copi o'i ohebiaeth â threfnwyr yr isod, ynghyd â gofyn am sylwadau'r Cyngor arnynt:

- i) ***Digwyddiadau yn Aber-soch a'r Cylch – Rasys 10k a 3k, Treiathlon Sprint a Glass Butter Beach***  
Dim gwrthwynebiad ond, gofynnwyd pam bod angen trwydded yfed/cerddoriaeth i'r 'wire tow' yn yr Harbwr, gan fod digon o dafarndai gerllaw. Ychwanegodd Cyng. Wyn Williams y gofynnodd y Gymdeithas Masnachwyr a ellid tocio'r llwyni ar y bont – cytunodd y

perchnogion eraill eisoes. Penderfynwyd cydsynio â'r cais ond, nid tan fyddai'r tymor nythu drosodd.

- ii) ***Digwyddiad Codi Arian at Drychineb Daeargryn Nepal ar Borth Fawr***  
Dim gwrthwynebiad i gynnal digwyddiad 'chwythu swigod o gariad i Nepal bore Sul, Mai 24ain.
  
- ch) **Swyddog Bioamrywiaeth – Torri Coeden Sycamorwydden ger 156 Cae Du**  
Bu'n rhaid torri'r goeden uchod oherwydd ei chyflwr gwael.
  
- d) **Ombwdsmon Gwasanaethau Cyhoeddus Cymru – Cyfarwyddyd Diwygiedig ar y Cod Ymddygiad**  
Llythyr yn hysbysu'r uchod, yn dilyn derbyn nifer o gwynion lefel isel gan aelodau cynghorau cymuned a thref – argraffwyd copi caled o'r Canllawiau oddi ar y wefan, gan na chynhyrchir copïau caled.
  
- dd) **Gwasanaeth Cynllunio – Bryn Cethin Bach, Aber-soch**  
Derbyniwyd cwyn am yr arwydd o frics a osodwyd yn mynediad yr uchod ac ymatebodd yr Uwch Swyddog Gorfodaeth drwy ddweud yr edrychir i mewn i'r mater.
- e) **AON Ltd. – Yswiriant**  
Llythyr yn cynnig gwahanol brisiau ar gyfer yswiriant y Cyngor o Fehefin 1af – fe'i hysbyswyd mai ym mis Medi mae'n amser adnewyddu a'i fod mewn cytundeb tair blynedd.
  
- f) **Adran Rheoleiddio – Cyd-bwyllgor AHNE Llŷn**  
Copi o rifyn diweddaraf *Llygad Llŷn* a Thaflen Benderfyniad ei Gyfansoddiad a ddiwygiwyd trwy drefn ddirprwyedig yr Aelod Cabinet; caniatá'r diwygiad unrhyw aelod o'r Cyd-bwyllgor weithredu fel Cadeirydd.
  
- ff) **Cyng. Wyn Williams – Teithio Cymru**  
Copi o ohebiaeth rhyngddo a Sustrans Cymru parthed llwybr cerdded a beicio rhwng Pwllheli ac Aber-soch. Nodir y ceisia Cyngor Gwynedd ddatblygu'r llwybr ond, bod problemau â pherchnogaeth tir.
  
- g) **Cefnogaeth Gorfforol – Her Gwynedd**  
Gwahoddiad i drafod yr uchod mewn cyfarfod yng Nghlwb Rygbi Pwllheli, Bodegroes, rhwng chwech ac wyth o'r gloch ar Fehefin 11eg – angen cadarnhau presenoldeb cyn Mai 28ain; neb am fynd.

## 9. DYFARNIADAU CYNLLUNIO

- C15/0244/39/LL Estyniad cefn unllawr a chreu cyflesuter parcio oddi ar y stryd – Cae Pen Cottage, Cae Pin, Aber-soch – **Caniatawyd ag amodau**
- C15/0241/39/LL Estyniad llawr cyntaf uwchben modurdy presennol – Arfor, Aber-soch – **Caniatawyd ag amodau**



## **CEISIADAU A DYNWYD YN ÔL**

C14/1109/39/LL Adeiladu chwech o dai cychod deulawr – Riverside Hotel & Restaurant, Aber-soch

### 10. **CADARNHAU TALIADAU A DERBYNIADAU**

#### **Taliadau**

Cadarnhawyd talu cyflog mis Mai y Clerc (Rh/S 001908), ynghyd â'r taliadau a ganlyn:

- a) Cyngor Gwynedd – £7.26 (Rh/S 001905 – Treth y Toiledau 2014-2015)
- b) Cyngor Gwynedd – £674.80 (Rh/S 001906 – Treth y Toiledau 2015-2016)
- c) R.W. Griffith – £704.75 (Rh/S 001907 – Barbio Cae Chwarae Aber-soch a Thy'n Ronnen, Mynytho)
- ch) Cronfa'r Cadeirydd – £500.00 (Archeb Barhaol)
- d) PWLB – £2253.13 (Ad-daliad Cyntaf Benthyciad y Toiledau)
- dd) Delwedd Cyf. – £500.00 (Rh/S 001909 – Gweddill Cost Creu'r Wefan)
- e) Clerc – £18.00 (Rh/S 001910 – Ad-daliad Teitlau Y Gofrestrfa Tir)
- f) W. a G. Williams – £45.97 (Rh/S 001911 – Cloeon a Chodwr Ysbwriel)

#### **Derbyniadau**

- a) Cyngor Gwynedd – £500.00 (Nawdd Llywodraeth Cymru at Greu Gwefan)
- b) Arian Mynediad y Toiledau – £226.80
- c) Cyllid a Thollau EM – £6142.61 (Ad-daliad TAW)

### 11. **DYDDIAD AC AMSER Y CYFARFOD NESAF**

Nos Lun, Mehefin 1af, 2015 am saith o'r gloch i gadarnhau Cyfrifon 2014 – 2015  
Nos Fercher, Mehefin 10fed, 2015 am saith o'r gloch